



Uprkos sili nasilnika, Allah će pomoći vjernike (Medina)

Hatib: dr. Salah ibn Muhammed el-Budejr

03. džumadel-ula 1445. god. po Hidžri / 17. novembar 2023.

Hvala Allahu, Uzvišenom, na svemu što je odredio, Silnom, Moćnom, Onome Koji poznaje stanje Svoga roba u tajnosti i javnosti, i Koji čuje jecaj obespravljenog i bespomoćnog i obdaruje ga Svojom pomoći i pobjedom. Zahvaljujem Mu na odredbi dobra i zla, "slatkoj" i "gorkoj". Svjedočim da nema boga osim Allaha, Jedinog, Koji druga nema, Čija su znamenja veličanstvena: "Jedan od dokaza Njegovih je i to što nebo i Zemlja postoje voljom Njegovom" (Er-Rum, 25), i svjedočim da je naš vjerovjesnik i prvak Muhammed, sallallahu alejhi ve sellem, Njegov rob i poslanik, koji se na Allahovom putu borio onako kako se treba boriti, tokom cijelog svog života, neka su na njega Allahova milost, blagoslov i spas, i na njegovu porodicu i ashabe, sve dok oblaci daju kišu i dok bude cvjetalo proljeće.

O muslimani, bojte se Allaha, ujutro i uvečer, i nemojte biti od onih koji su nemarni, koji čine zlo i oponašaju grešnike koji su se udaljili od Allaha. "O vjernici, bojte se Allaha onako kako Ga se treba bojati, i umirite samo kao muslimani." (Ali Imran, 102)

O muslimani! Vrijeme je oluja koja kruži i iskušenje koje iscrpljuje: mir i rat, gorko i slatko, obilje i suša, a koliko god se nagomilalo zla i nevolja, iskušenja i teških stvari, vjernik pouzdano zna da niko ne može spriječiti zapisanu odredbu, kader. Što je određeno, to će biti, što je zapisano, iščekuje se, što Allah hoće i ono što On presudi, sigurno će se desiti. Niko ne može uzvisiti ono što je On unizio, niti uniziti ono što je On uzvisio, niko ne može uskratiti ono što je On dao, niti dati ono što je On uskratio, ono što želi naš Gospodar, to će i učiniti. Stoga nema mjesta za očajavanje i beznađe, nego je potrebno podsticati na strpljenje, i sebe i druge, i gajiti optimizam u to da konačna pobjeda pripada sljedbenicima islama i imana, a poniženje i propast





zulumčarima, nasilnicima i tiranima. “a Allah čini šta hoće, ali većina ljudi ne zna.”
(Jusuf, 21)

O muslimani! Zaista se srce kida od bola i tuge zbog iskušenja i nedaća kroz koje prolaze stanovnici Gaze. Zlo je dostiglo vrhunac, spletke i nepravda svoju krajnju granicu. Nepravda ne može trajati vječno, kad-tad će prestati i urušiti se, a vrijeme će se okrenuti. Nasilnici će saznati kakav kraj čeka umišljene. Ebu Musa el-Eš'ari, radijallahu anhumu, prenosi da je Allahov Poslanik, sallallahu alejhi ve sellem, rekao: “Allah odlaže kaznu nasilniku, ali kada odluči da ga kazni, ne može izbjeći Njegovu kaznu”, zatim je proučio ajet: “Eto, tako Gospodar tvoj kažnjava kad kažnjava sela i gradove koji su nasilje činili. Kažnjavanje Njegovo je zaista bolno i strašno.” (Hud, 102)

O muslimani, koliko su se nasilnici samo osilili zbog snage i mnoštva, ali su zaboravili da Allah, džellešānuhu, opskrbljuje i učvršćuje potlačene i obespravljene strpljenjem i konačnom pobjedom. Koliko god bila velika snaga tiranina, i slabost potlačenog, tiranin će biti poražen, ponižen i sputan. Najizvjesnija stvar je pad tiranina, a “najprodornija strijela” je dova potlačenog, koju Živi i Vječni uzdiže iznad oblaka.

Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: “Trojici se ne odbija dova: postaču dok ne iftari, pravednom vladaru i obespravljenom, čiju dovu Allah uzdiže iznad oblaka, otvara joj vrata nebesa i kaže: “Tako Mi Moga ponosa i uzvišenosti, pomoći ću ti, makar nakon određenog vremena.” (Hadis bilježe Ahmed i Tirmizi, a vjerodostojnim su ga ocijenili Ibn Huzejma i Ibn Hadžer.)

Slavljen neka je Onaj Koji čuje jecaj progonjenog i brigama ophrvanog, i Koji čuje molbu unesrećenog i tužnog, i Koji je uzvisio potlačenog, a spustio tlačitelja.

O muslimani! Nasilnik, tlačitelj bit će uvijek okružen osjećajima mržnje, neprijateljstva i prezira, i nikada neće živjeti sigurno, i neće uživati u miru, njegov život bit će tjeskoban, ispunjen opasnostima i nesanicom, koliko god se pokušavao opravdati lažima, kakve god spletke pravio i koliko god se pretvarao da je on





obespravljen i da se njemu čini nepravda, jer nepravda navlači mržnju i uzrokuje nevolje, uništava blagodati i donosi kaznu.

O muslimani! Allah nekada daje nevjerniku blagodat koristi, ili blagodat otklanjanja nedaće, ili blagodat napredovanja, ali sve je to samo istidradž – postepeno približavanje kazni u formi blagodati i davanja. Uzvišeni kaže: "Neka nikako ne misle nevjernici da je dobro za njih to što im dajemo dug život. Mi im ga dajemo samo zato da što više ogreznu u grijehu; njih čeka sramna patnja." (Ali Imran, 178)

I kaže Uzvišeni: "... i davat ću im vremena, obmana Moja doista je trajna." (El-A'raf, 183)

I kaže: "Misle li oni – kad ih imetkom i sinovima pomažemo, da žurimo da im neko dobro učinimo? Nikako, ali oni ne opažaju." (El-Mu'minun, 55–56)

Uživanje nevjernika u blagodatima pomiješano je s iskušenjima i nemilim stvarima, pomučeno s bolestima, nevoljama, strahom i pomanjkanjem zadovoljstva. Uzvišeni kaže: "A nevjernike će nesreća neprestano pogađati ili će se u blizini mjesta njihova događati, zbog onoga što rade – sve dok se Allahova prijetnja ne ispuni. Allah će, sigurno, održati obećanje." (Er-Ra'd, 31)

I kaže Uzvišeni: "Neka te nikako ne obmanjuje to što oni koji ne vjeruju po raznim zemljama putuju." (Ali Imran, 196) Neka te ne obmanjuje njihova vojna pripremljenost, niti njihova oholost, tiranija, snaga i moć. "... kratko uživanje, a poslije – Džehennem će biti mjesto gdje će boraviti, a užasno je to prebivalište!" (Ali Imran, 197)

I kaže Uzvišeni: "Oni koji ne vjeruju troše imanja svoja da bi od Allahova puta odvraćali. Oni će ih, sigurno, utrošiti, zatim će, zbog toga, žaliti i na kraju će pobijedeni biti. A oni koji ne budu vjerovali – u Džehennem će biti potjerani." (El-Enfal, 36)

O muslimani, bojte se Allaha, bogobojaznost je najjači saveznik i najvjerniji pomagač.

Svaka stvar Njemu je lahka, sve o Njemu ovisi, sve se Njemu vraća, On Sve vidi i sve čuje. Njemu nije skrivena velika nepravda koja se čini muslimanima, i On je kadar





poslati im Svoju pomoć. "O vjernici, bojte se Allaha i budite sa onima koji su iskreni."
(Et-Tevba, 119)

O muslimani, vrijeme ima dva okusa: sladak i gorak, i dani imaju dva lica: teškoću i last. Svaka teškoća ide ka blagostanju, i svaka noć ide ka svanuću, poslije mutnoće dolazi bistrina, poslije kiše sunce, sunce zađe, pa izađe, bašta se osuši pa procvjeta, Allah ima dane u kojima kažnjava nasilnike.

Ukrasite svoje živote pokornošću Allahu, držite se džemata, čuvajte se mržnje i sukoba, pazite se rasprave i svađe, i znajte da onaj ko čini šta mu je volja, naći će ono što će ga rastužiti, a onaj ko popravi svoja loša djela, uništiti će zavidnike.

Najbolja zaštita je čvrsta predanost Kur'anu i sunnetu, po uzoru na prve generacije muslimana.

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

